

# याकूब की चिट्ठी

**1** याकूब का, जो पणमेसर अर प्रभु यीशु मसीह का दास सै, संतां के बारहां कुलां ताहीं नमस्कार पहोच्चै जो साबते संसार म्ह फैलरे सैं।

## बिश्वास अर विवेक

**2** हे मेरे भाइयो, जब कदे भी थम कई तरियां की परीक्षायां म्ह पड़ो तो इस ताहीं बड़े आनन्द की बात समझो। **3** क्यूँके थम न्यू जाणो सो के थारा बिश्वास जब परीक्षा म्ह सफल होवै सै तो उसतै धीरज तै भरी सहन शक्ति पैदा होवै सै। **4** अर वा धीरज तै भरी सहन शक्ति एक इसी भरपूरी नै जन्म देवै सै जिस तै थम इसे सिद्ध बण सको सो जिनम्ह कमी कोनी रह जावै सै।

**5** इस तरियां तै जै थारे म्ह तै किसे म्ह विवेक की कमी सै तो ओ उस ताहीं पणमेसर तै माँग सकै सै। ओ सारया ताहीं राज्जी होके उदारता कै गेल्या देवै सै। **6** बस बिश्वास कै गेल्या मांग्या जावै। माड़ा सा भी शक नीं होणा चाहिये। क्यूँके जिस नै शक होवै सै, ओ समन्दर की उस लहर कै जिसा सै जो हवा तै उट्टै सै अर थरथरावै सै। **7** इसे माणस ताहीं न्यू नीं सोचना चाहिये के उस ताहीं प्रभु तै कीमे भी मिल पावैगा।

**8** इसे माणस का मन तो दुविधा म्ह पड़या सै। ओ अपने सारे काम्मां म्ह चंचल सै।

## साच्चा धन

**9** साधारण हालातां आळे भाई नै गर्व करणा चाहिये के पणमेसर नै उस ताहीं आत्मा का धन दिया सै। **10** अर अमीर भाई नै गर्व करणा कहिये के पणमेसर नै उस ताहीं नरमाई दी सै। क्यूँके उस ताहीं तो घास पै खिलण आळे फूल कै तरियां झड़ जाणा सै। **11** सूरज कड़कड़ान्दा होड़ घाम लिये होड़ उगै सै अर पौधयां ताहीं सुखा देवै सै। उनकी फूल पत्तियाँ झड़ जावै सैं अर सुथरापण खत्म हो जावै सै। इस्से ढाळ अमीर माणस भी आपणी भाज-दौड़ कै गेल्या खत्म हो जावै सै।

## पणमेसर परीक्षा कोनी लेन्दा

**12** ओ माणस धन्य सै जो परीक्षा म्ह अटल रहवै सै क्यूँके

परीक्षा म्ह खरया उतरण कै बाद ओ जीवन के उस विजय मुकुट ताहीं धारण करैगा, जिस ताहीं पणमेसर नै अपने प्रेम करण आळयां ताहीं देण का बचन दिया सै। **13** परीक्षा की घड़ी म्ह किसे ताहीं न्यू नीं कहणा चाहिये के “पणमेसर मेरी परीक्षा लेण लागरया सै,” क्यूँके भुंडी बात्तां तै पणमेसर नै कोए लेणा देणा नीं सै। ओ किसे की परीक्षा कोनी लेन्दा। **14** हरेक कोए आपणी ए भुंडी इच्छायां कै भ्रम म्ह फँसकै परीक्षा म्ह पड़ै सै। **15** फेर जब वा इच्छा गर्भवती होवै सै तो पाप पूरा बढ़ जावै सै अर ओ मौत ताहीं जन्म देवै सै।

**16** इस तरियां तै मेरे प्यारे भाइयो, धोक्खा मतना खाओ। **17** हरेक उत्तम दान अर भरपूरी आळे तोपफे ऊप्पर तै ए मिलै सैं। अर वे उस परम पिता कै जरिये जिसनै सुर्गीय चाँदणे ताहीं जन्म दिया सै, तळै ल्याए जावै सैं ओ तारयाँ की चालढाल तै पैदा छाया तै कदे भी बदलदा नीं सै। **18** सत्य के सुथरे संदेश कै जरिये आपणी ऊलाद बनाण कै खात्तर उसनै म्हारै ताहीं छांटया। ताके हम सारे प्राणियां कै बिच्चाळे उसकी फ़सल के पहल्ले फल सिद्ध होवां।

## सुणना अर उस पै चालणा

**19** हे मेरे भाइयो, याद राखो, हरेक किसे ताहीं तगाज्जे कै गेल्या सुणना चाहिये, बोल्लण म्ह तगाज्जा मतना बरतो, छोह करण म्ह उतावळापण मतना बरतो। **20** क्यूँके माणस के छोह तै पणमेसर की धार्मिकता कोनी उपजदी। **21** हरेक धिनीणे अचम्भे तै अर चौगरदेकै फैल्ली दुष्टता तै दूर रहो। तथा नरमाई कै गेल्या थारे हृदयां म्ह बोए गए पणमेसर के बचन ताहीं अपनाओ जो थारी आत्मायाँ नै उद्धार दुवा सकै सै।

**22** पणमेसर की शिक्षा पै चाल्लण आळे बणो, ना के सिर्फ उस ताहीं सुणण आळे। जै थम उस ताहीं सुणदे भर हो तो थम अपने आप ताहीं धोक्खे म्ह राखो सो। **23** क्यूँके जै कोए पणमेसर की शिक्षा नै सुणै तो सै अर उस पै चाल्दा ना हो, तो ओ उस माणस की तरियां ए सै जो अपने असली मुँह ताहीं सीसे म्ह देक्खै भर सै। **24** ओ खुद ताहीं आच्छी तरियां देक्खै सै, पर जब ओडै तै चल्या जावै तो तुरत भूल जावै सै के ओ

किसा दिक्खण लागरया था। <sup>25</sup>किन्तु जो पणमेसर की उस सम्पूर्ण व्यवस्था नै लवै तै देखे सै, जिस तै अजादी मिलै सै अर उससे पै आचरण भी करदा रहवै सै, अर सुण कै उस ताहीं भूले बिना अपने आचरण म्ह उतारदा रहवै सै, ओए अपने कर्मा कै खात्तर धन्य होवैगा।

### भगति का साच्चा राह

<sup>26</sup>जै कोए सोचवै सै के ओ भगत सै अर आपणी जीभ पै कस कै लगाम कोनी लांदा तो ओ धोक्खे म्ह सै। उसकी भगति बेकार सै। <sup>27</sup>परम पिता पणमेसर कै श्यामी साच्ची अर शुद्ध भगति वाए सै जिसम्ह अनाथां अर विधावायां की उनके दुःख दर्द म्ह सुधि ली जावै अर खुद ताहीं कोए सांसारिक कलंक नीं लगण दिया जावै।

### सबतै प्रेम करो

<sup>2</sup>हे मेरे भाइयो, म्हारे महिमावान प्रभु यीशु मसीह म्ह जो थारा बिश्वास सै, ओ पक्षपात (दुबात) तै भरया ना हो। <sup>2</sup>मान कै चाल्लो थारी सभा म्ह कोए माणस सोन्ने की अँगूठी अर सुथरे लत्ते पहेरे होइ आवै सै। अर जिब्बे मैले कुचैले लत्ते पहेरे एक गरीब माणस भी आवै सै। <sup>3</sup>अर थम जिसनै सुथरे लत्ते पहेरे राक्खे सैं, उस ताहीं खास महत्व देन्दे होए कहो सो, “उरै इस उत्तम जंगहा पै बैट्टो”, जिब के उस गरीब माणस तै कहो सो, “उरै खड़या रह” या “मेरे पैरयां कै धौरै बैट ज्या।” <sup>4</sup>इसा करदे होए के थमनै अपने बिच्चाळै कोए दुबात कोनी करी अर भुण्डे बिचारां कै गेल्या जज कोनी बण गे?

<sup>5</sup>हे मेरे प्यारे भाइयो, सुणो के पणमेसर नै संसार की आँखां म्ह उन गरीबां ताहीं बिश्वास म्ह अमीर अर उस राज्य के उत्तराधिकारी या वारिस कै रूप म्ह कोनी छांटया, जिसका उसनै, जो उस ताहीं प्रेम करै सैं, देण का बचन दिया सै। <sup>6</sup>किन्तु थमनै तो उस गरीब माणस कै बाबत नफरत दिखाई सै। के ये अमीर माणस वैए नीं सैं, जो थारा शोषण करै सैं अर थारे ताहीं कचहड़ियां म्ह घसीट ले जावै सैं? <sup>7</sup>के ये वैए नीं सैं, जो मसीह के उस उत्तम नाम की बुराई करै सैं, जो थारे ताहीं दिया गया सै?

<sup>8</sup>जै थम शास्त्र म्ह मिलण आळी इस सारया तै ऊँच्ची व्यवस्था का साच्चे पालन करो सो, “अपणे पडोसी तै उससे

तरियां ए प्रेम करो, जिस तरियां थम अपने आप तै करो सो” तो थम आच्छा ए करो सो। <sup>9</sup>किन्तु जै थम दुबात दिखाओ सो तो थम पाप करण लागरे सो। फेर थारे ताहीं व्यवस्था के विधान ताहीं तोड़ण आळा ठहराया जावैगा।

<sup>10</sup>क्युँके कोए भी जै साबती व्यवस्था का पालन करै सै अर एक बात म्ह चूक जावै सै तो ओ साबती व्यवस्था के उल्लंघन का कसूरवार हो जावै सै। <sup>11</sup>क्युँके जिसनै न्यू कह्या था, “जारी मतना करो” उससेए नै न्यू भी कह्या था, “खून मतना करो।” इस तरियां तै जै थम जारी कोनी करदे किन्तु खून करो सो तो थम व्यवस्था ताहीं तोड़ण आळे सो।

<sup>12</sup>थम उन्ने ए लोगां कै तरियां बोल्लो अर उन्ने ए के जिसा आचरण करो जिनका उस व्यवस्था कै मुताबिक न्याय होण जाण लागरया सै, जिसतै छुटकारा मिलै सै। <sup>13</sup>जो दयालु कोनी सै, उसके खात्तर पणमेसर का न्याय भी बिना दया कै ए होगा। किन्तु दया न्याय पै विजयी सै।

### बिश्वास अर साच्चे काम

<sup>14</sup>हे मेरे भाइयो, जै कोए माणस कहवै सै के ओ बिश्वासी सै तो इसका के फैयदा जिब लग के उसके काम बिश्वास कै मुताबिक ना हों? इसा बिश्वास के उसका उद्धार कर सकै सै? <sup>15</sup>जै भाइयो अर बहणां ताहीं लत्त्यां की जरूरत हो, उनके धौरै खाण लग नै ना हो <sup>16</sup>अर थारे म्ह तै ए कोए उन तै कहवै, “शान्ति तै जाओ, पणमेसर थारा कल्याण करै, अपने ताहीं गरमाओ तथा आच्छी ढाळ भोजन करो” अर थम उनकी देही की जरूतां की चिज्जां उन ताहीं ना द्यो तो फेर इसका के मोल सै? <sup>17</sup>इस्से ढाळ जै बिश्वास कै गेल्या कर्म नीं सै तो ओ अपने आप म्ह मरया होइ सै।

<sup>18</sup>किन्तु कोए कह सकै सै, “थारे धौरै बिश्वास सै, जिब के मेरे धौरै कर्म सै इब थम बिना कर्मा कै आपणा बिश्वास दिखाओ अर मैं थारे ताहीं आपणा बिश्वास अपने कर्मा कै जरिये दिखाऊँगा।” <sup>19</sup>के थम बिश्वास करो सो के पणमेसर सिर्फ एक सै? अद्भुत! भूंडी औपरी आत्माएँ न्यू बिश्वास करै सैं के पणमेसर सै अर वे काम्बदी रहवै सैं।

<sup>20</sup>अरै बेअक्ले! के तन्नै सबूत चाहिये के कर्म बिना बिश्वास बेकार सै? <sup>21</sup>के म्हारा पिता अब्राहम अपने कर्मा कै आधार पै ए उस बख्त धर्मी कोनी ठहराया गया था जिब उसनै अपने बेट्टे इसहाक ताहीं वेदी पै चढ़ाया था? <sup>22</sup>तू देख

के उसका ओ बिश्वास उसके कर्मा के गेल्या ए सक्रिय होण लागरया था। अर उसके कर्मा तै ए उसका बिश्वास भरया पूरा करया गया था। **23** इस ढाळ शास्त्र का यो कह्या पूरा होया था, “अब्राहम नै पणमेसर पै बिश्वास करया अर बिश्वास के आधार पै ए ओ धर्मी ठहरया” अर इस्से तै ओ “पणमेसर का ढब्बी” कुवाया। **24** थम देखो के सिर्फ बिश्वास तै नीं, बल्के अपने कर्मा तै ए माणस धर्मी ठहरै सै।

**25** इस्से ढाळ राहब बेश्या भी के उस बखत अपने कर्मा तै धर्मी कोनी ठहरायी गयी, जिब उसनै दुतां ताहीं अपने घर म्ह शरण दी अर फेर उनै दुसरे राह तै किते भेज दिया।

**26** इस ढाळ जिस तरियां बिना आत्मा के देही मरी होइ सै, उस्से तरियां ए कर्म बिना बिश्वास भी मरया होइ सै।

### बाणी का संयम

**3** हे मेरे भाइयो, थारे म्ह तै भोत से ताहीं उपदेश देणीया बनण की इच्छा नीं करणी चाहिये। थम जाणो ए सो के हम उपदेशकां का और घणा करड़ाई कै गेल्या न्याय करया जावैगा।

**2** में थमनै इस बाबत ज्यातै चेतान लागरया सू के हम सारया तै भोत-सी भूल होन्दी ए रहवै सैं। जै कोए बोल्लण म्ह कोए भी चूक ना करै तो ओ एक सिद्ध माणस सै तो फेर इसा कौण सै जो उस पै पूरी तरियां काबू पा सकै सै? **3** हम घोड़यां के मुँह म्ह ज्यातै लगाम लावां सां के वे म्हारै बस म्ह रहवै अर इस ढाळ उनकी साबती देही ताहीं हम बस म्ह कर सकां सां। **4** अथवा पाणी आळे जहाजां का उदाहरण भी लिया जा सकै सै। देखो, चाहे वे कितने ए बड़े होवै सैं अर ठाड़ी हवायां के जरिये चलाए जावै सैं, किन्तु एक छोटी सी पतवार तै उनका नाविक उन ताहीं जित किते ले जाणा चाहवै सै, उन पै काबू पाके उन ताहीं ले जावै सै। **5** इस्से ढाळ जीभ, जो देही का एक छोटा सा अंग सै, बड़ी-बड़ी बातां करण की डींग मारै सै।

अब माड़ा सा सोचो एक माड़ी-सी लपट साबते जंगल ताहीं जळा सकै सै। **6** हम्बै, जीभ एक लपट सै। या बुराई का एक पूरा संसार सै। या जीभ म्हारी देही के अंगां म्ह एक इसा अंग सै, जो साबती देही नै भ्रष्ट कर देवै सै अर म्हारे जीवन चक्र म्ह ए आग लगा देवै सै। या जीभ नरक की आग तै धधकदी रहवै सै।

**7** देखो, हरेक ढाळ के खतरनाक पशु, पंछी, रेंगण आळे

जीव-जन्तु, पाणी म्ह रहण आळे प्राणी माणस के जरिये बस म्ह करे जा सकै सैं अर करे भी गये सैं। **8** किन्तु जीभ ताहीं कोए माणस बस म्ह कोनी कर सकदा। या घातक जहर तै भरी एक इसी बुराई सै जो कदे भी चैन तै कोनी रहन्दी। **9** हम इस्से तै अपने प्रभु अर पणमेसर की स्तुति करां सां अर इस्से तै लोगां ताहीं जो पणमेसर की समरूपता म्ह पैदा करे गये सां, कोस्सां भी सां। **10** एक ए मुँह तै आशीर्वाद अर अभिशाप दोन्नु लिकड़ै सैं। मेरे भाइयो, इसा तो नीं होणा चाहिये। **11** सोते कै एक ए मुहाने तै भला के मिट्टा अर खारा दोन्नु ढाळ का पाणी लिकड़ सकै सै? **12** मेरे भाइयो, के अंजीर के दरखत जैतून या अंगूर की डाळी पै कदे भी अंजीर लागे सैं? जमा ए नीं। अर ना ए खारे स्रोत तै कदे भी मिट्टा पाणी लिकड़ पावै सै।

### साच्चा विवेक

**13** भला थारे म्ह, ज्ञानी अर समझदार कौण सै? जो सै, उस ताहीं बिवार तै न्यू दिखाणा चाहिये के उसके कर्म उस सज्जनता के गेल्या करे गये सैं जो ज्ञान तै जुड़ी सै। **14** किन्तु जै थम लोगां के हृदयां म्ह भयंकर ईर्ष्या अर स्वार्थ भरया होया सै, तो अपने ज्ञान का ढोल मतना पीटो। इसा करके तो थम सत्य पै पड़दा गेरदे होए झूठ बोल्लण लागरे सो। **15** इसा “ज्ञान” तो ऊपर यानि सुर्ग तै, मिलदा कोनी, बल्के ओ तो भौतिक सै। आत्मिक कोनी सै। तथा शैतान का सै। **16** क्यूँके जित ईर्ष्या अर स्वार्थ भरे अरमान रहवै सैं, ओड़े गडबडी अर हरेक ढाळ की भूँडी बात रहवै सै। **17** किन्तु सुर्ग तै आण आळा ज्ञान सारया तै पहल्या तो पवित्र होवै सै, फेर शान्ति तै भरया, सहनशील, सहज-प्रसन्न, करुणा तै भरया होवै सै। अर उसतै उत्तम कर्मा की फसल उपजै सै। ओ पक्षपात-रहित अर साच्चा भी होवै सै। **18** शान्ति के खात्तर काम करण आळे लोगां ताहीं ए धार्मिक जीवन का फळ मिलैगा जै उस ताहीं शान्ति तै भरया माहौल म्ह बोया गया सै।

### पणमेसर नै समर्पित हो जाओ

**4** थारे बिच्चाळे लड़ाई-झगड़े क्यातै होवै सैं? के उनका कारण थारे अपने ए भीतर नीं सै? थारी वे भोग-विलास तै भरी इच्छाएँ ए जो थारे भीतर लगातार लड़दी रहवै सैं, के उन्ने तै ए ये पैदा नीं होदे? **2** थम लोग चाहो तो सो

किन्तु थमने मिल नीं पांदा। थारै म्ह ईर्ष्या सै अर थम दुसरयां का खून करो सो, फेर भी जो चाहो सो, मिल नीं पांदा। अर इस करके लड़ो-झगड़ो सो। आपणी मर्जी आळी चिज्जां ताहीं थम पा नीं पाण्डे क्युँके थम उन ताहीं पणमेसर तै कोनी माँगदे। **3**अर जब माँगो भी सो तो थारा मकसद आच्छा कोनी होंदा। क्युँके थम उन ताहीं अपने भोगविलास म्ह ए उड़ाण ताहीं माँगो सो।

**4**ओ, बिना बिश्वास करणीयें लोगों! के थमने कोनी बेरा के संसार तै प्रेम करणा पणमेसर तै नफरत करण के जिसा ए सै? जो कोए इस दुनिया तै दोस्ती राखणा चाहवै सै, ओ अपने आप ताहीं पणमेसर का दुश्मन बनावै सै। **5**अथवा के थम न्यू सोचो सो के शास्त्र इसा खामखाँ म्ह ए कहवै सै के, “पणमेसर नै म्हारै भीतर जो आत्मा दी सै, ओ ईर्ष्या तै भरी इच्छायां तै भरी रहवै सै।” **6**किन्तु पणमेसर नै म्हारै पै भोत ए घणा अनुग्रह दिखाया सै, इस करके शास्त्र म्ह कह्या गया सै, “पणमेसर घमण्डीयां का विरोधी सै, जब के दीन जनां पै आपणा अनुग्रह दिखावै सै।”

**7**इस करके अपने आप ताहीं पणमेसर के अधीन कर द्यो। शैतान का विरोध करो, ओ थारै श्यामी तै भाज खड़या होगा। **8**पणमेसर के धोरै आओ, ओ भी थारै धोरै आवैगा। और पापियों! अपने हाथ शुद्ध करो अर और शक करण आळों, अपने हृदयां नै पवित्र करो। **9**शोक करो, बिलाप करो अर दुखी होओ। हो सकै सै थारी या हास्सी शोक म्ह बदल जावै अर थारी या खुशी विषाद म्ह बदल जावै। **10**प्रभु के श्यामी दीन बणो। ओ थारै ताहीं ऊँच्चा उठावैगा।

### जज थम नीं सो

**11**हे भाइयो, एक दुसरे के बिरोध म्ह बोलणा बन्द करो। जो अपने ए भाई के बिरोध म्ह बोल्लै सै, अथवा उसनै कसूरवार ठहरावै सै, ओ व्यवस्था के ए बिरोध म्ह बोल्लै सै अर व्यवस्था नै कसूरवार ठहरावै सै। अर जै थम व्यवस्था पै दोष लगाओ सो तो व्यवस्था के विधान का पालन करण आळे नीं रहन्दे बल्के उसके जज बण जाओ सो। **12**व्यवस्था के विधान ताहीं देण आळा अर उसका जज तो बस एक ए सै। अर ओए रूखाळी कर सकै सै अर ओए नास करै सै। तो फेर अपने ढब्बी का न्याय करण आळे थम कौण होवो सो?

### आपणा जीवन पणमेसर नै चलाण द्यो

**13**इसा कहण आळों सुणो, “आज या काल हम इस या उस नगर म्ह जाके साल-एक भर ओड़ै ब्यापार म्ह धन लगा के भोत सा पिस्सां बणा लेवांगे।” **14**किन्तु थम तो इतना भी कोनी जाणदे के काल थारै जीवन का के बणैगा! देखो, थम तो उस धुंध के बरगे सो जो माड़ी सी वार ताहीं उट्टै सै अर फेर खु जावै सै। **15**इस तरियां तै इसकी जंगहा पै थमने तो सारीहाण योए कहणा चाहिये, “जै प्रभु नै चाहया तो हम जीवांगे अर यो या ओ करांगे।” **16**किन्तु हालत तो या सै के थम तो अपने आडम्बरां के खात्तर खुद पै घमण्ड करो सो। इसे सारे घमण्ड भुण्डे सैं। **17**तो फेर न्यू जाणदे होए भी के न्यू सही सै, उस ताहीं नीं करणा पाप सै।

### स्वार्थी अमीर दण्ड के साइड़ीदार होवेंगे

**5** हे अमीरों सुणो, जो बिपदां थारै पै आण आळी सैं, उनके खात्तर मतना रोओ अर ऊँच्चे बोल म्ह बिलाप करो। **2**थारा धन सड़ लिया सै। थारे लत्ते कीड़यां नै खा लिया सै। **3**थारा सोन्ना चाँदी जंग लागण तै बिगड़ गया सै। उन पै लागी जंग थारे बिरोध म्ह गवाही देवैगी अर थारे मांस नै आग की तरियां चट कर जावैगी। थमने आपणा खजाना उस उम्र म्ह एक कान्नी उठा के धर दिया सै जिसका अंत आण नै सै। **4**देखो, थारे खेतां म्ह जिन मजदूरां नै काम करया, थमने उनकी मजदूरी रोक राखी सै। वाए मजदूरी चीख पुकार करण लागरी सै अर खेतां म्ह काम करण आळयां की वे चीख पुकारें सारया तै ठाड़े प्रभु के कान्नां लग पहोच्ची सैं।

**5**धरती पै थमने बिलास तै भरया जीवन जिया सै अर अपने आप ताहीं भोग- बिलासां म्ह डबोये राख्या सै। इस ढाळ थमने अपने आप ताहीं मर जाण के दिन के खात्तर पाळ-पोसके मोट्टा-ताज्जा कर लिया सै। **6**थमने भोळे लोग्गां ताहीं कसूरवार ठहराके उनके किसे प्रतिरोध के अभाव म्ह ए उनकी हत्याएँ कर दी।

### धीरज राक्खो

**7**इस तरियां भाइयो, प्रभु के दुबारे तै आण लग धीरज धरो। उस किसान का ध्यान धरो जो आपणी धरती की कीमती उपज के खात्तर बाट देखा रहवै सै। इसके खात्तर ओ सरूआळी

मिह तै लेके पाच्छैली मिह लग लगातार धीरज कै गेल्या बाट देखदा रहवै सै। **8** थारै तारीं भी धीरज कै गेल्या बाट देखणी पड़ैगी। अपणे हृदयां नै मजबूत बणाए राखो क्यूँके प्रभु का दुबारा आणा लवै ए सै। **9** हे भाइयो, आप्स म्ह एक दुसरे की सिकात मतना करो ताके थारै तारीं अपराधी नीं ठहराया जावै। देखो, जज तो भीतर आण कै खातर दरवाज्जे पै ए खड़या सै। **10** हे भाइयो, उन भविष्यवक्तायां नै याद राखो जिन्ने प्रभु कै खातर बोल्या। वे म्हारे खातर दुःख झेल्लण अर धीरज तै भरे सहनशीलता के उदाहरण सैं। **11** ध्यान राखियो, हम उनकी सहनशीलता के कारण उन तारीं धन्य मान्नां सां। थमनै अय्यूब के धीरज कै बारै म्ह सुण्या ए सै अर प्रभु नै उस तारीं उसका जो नतीज्जा दिया, उस तारीं भी थम जाणो ए सो के प्रभु कितना दयालु अर करुणा तै भरया सै।

### सोच समझ कै बोल्लो

**12** हे मेरे भाइयो, सारया तै बड़ी बात या सै के सुर्ग की या धरती की या किसे भी ढाळ की सूह खाणा छोड़ द्यो। थारी “हाँ”, हाँ होणी चाहिये, अर “ना” ना होणी चाहिये। ताके थारै पै पणमेसर का दण्ड ना पड़ै।


### प्रार्थना की ताकत

**13** जै थारै म्ह तै कोए बिपदा म्ह पड़या सै तो उस तारीं प्रार्थना

करणी चाहिये अर जै कोए खुस सै तो उस तारीं भजन गाणे चाहिये। **14** जै थारै बिच्चाळै कोए रोगी सै तो उस तारीं कलीसिया के अगुवां नै बुलाणा चाहिये के वे उसके खातर प्रार्थना करै अर उस पै प्रभु के नाम म्ह तेल मळें। **15** बिश्वास कै गेल्या करी गई प्रार्थना तै रोगी चंगा हो जावैगा। अर प्रभु उस तारीं उठाके खड़या कर देवै सै। जै उसनै पाप करे हो तो प्रभु उस तारीं माफ़ कर देवैगा।

**16** इस करके अपणे पापां नै आप्स म्ह मान ल्यो अर एक दुसरे कै खातर प्रार्थना करो ताके थम भले चंगे हो जाओ। धार्मिक माणस की प्रार्थना ठाड़ी अर असर आळी होवै सै। **17** नबी एलिय्याह एक माणस ए था ठीक म्हारै जिसा। उसनै तगाज्जे कै गेल्या प्रार्थना करी, के मिह ना बरसै अर साढे तीन बरस लग धरती पै मिह कोनी बरस्या। **18** उसनै फेर प्रार्थना करी अर अकास म्ह मिह उमड़ आया तथा धरती नै आपणी फ़सल उपजायीं।

### एक आत्मा की रुखाळी

**19** हे मेरे भाइयो, थारै म्ह तै कोए जै सत्य तै भटक जावै अर उस तारीं कोए फेर बोहड़ा ल्यावै सै, तो उसनै न्यू बेरा होणा चाहिये के **20** जो किसे पापी तारीं पाप के राह तै बोहड़ा ल्यावै सै, ओ उस पापी की आत्मा नै अनन्त मौत तै बचावै सै अर उसके पापां नै माफ़ करे जाण का कारण बणै सै। 

## नोट्स

---



---



---



---



---



---